



**SENARAI AHLI JAWATANKUASA PENULISAN KHUTBAH
MASJID AL WATHIQU BILLAH TUANKU MIZAN ZAINAL ABIDIN
UiTM SHAH ALAM**

- Penasihat** : Prof. Dr. Haji Muhamad Rahimi Osman
Dekan ACIS
- Pengerusi** : Ustaz Haji Hanafi Haji Hamdani
Pengarah Bahagian Hal Ehwal Islam
- Timbalan Pengerusi** : Ustazah Hajah Nor Rihah Haji Mohd Nadzir
Timbalan Pengarah II
Bahagian Hal Ehwal Islam
- Panel Penulis** : Ustaz Hj. Lufti Fauzi Haji Sabari
Pegawai Hal Ehwal Islam Kanan
UiTM Shah Alam
- : Ustaz Rafiuddin Mohd Yusof
Ketua Unit Hal Ehwal Islam
UiTM Cawangan Johor
Kampus SEgamat
- : Ustaz Saiful Anuar Mohamed Sani
Pegawai Hal Ehwal Islam Kanan
UiTM Cawangan Selangor
Kampus Puncak Alam
- : Ustaz Mohd Faizan Tajuid
Pegawai Hal Ehwal Islam
UiTM Shah Alam

“Menginsankan Inovasi Untuk Pendidikan Berkualiti ”.

أَلْحَمْدُ لِلَّهِ الْقَائِلِ:

إِنَّ فِي خَلْقِ السَّمَوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لَآيَاتٍ لِأُولِي

الْأَلْبَابِ ١٩٠

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ
لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ
وَعَلَى آلِهِ وَصَحْبِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ،
أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.
قَالَ اللَّهُ تَعَالَى: يَتَأَيُّهَا الَّذِينَ ءَامَنُوا اتَّقُوا اللَّهَ

حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ

Hadirin sidang Jumaat yang berbahagia,

Marilah bersama-sama kita tingkatkan ketakwaan kita kepada Allah swt dengan melaksanakan segala suruhan Nya dan meninggalkan segala apa yang dilarang. Mudah-mudahan kita semua tergolong dalam kalangan orang-orang yang mendapat perlindungan Allah pada hari akhirat kelak.

Mimbar pada hari ini akan membicarakan khutbah yang bertajuk **“MENGINSANKAN INOVASI UNTUK PENDIDIKAN BERKUALITI”** iaitu tema Bulan Inovasi UiTM 2018 yang telah disambut hari kemuncaknya pada 13hb Disember 2018 (semalam).

Sebelum meneruskan khutbah ini, khatib ingin mengingatkan sidang hadirin sekalian akan pesanan Rasulullah SAW supaya dapat menumpukan perhatian kepada khutbah yang akan disampaikan dan tidak bercakap-cakapserta tidak melakukan perkara yang sia-sia. Ini termasuk membuka telefon bimbit ketika khatib sedang menyampaikan khutbah.

Hadirin sidang Jumaat yang berbahagia,

Menurut Kamus Dewan Bahasa dan Pustaka, Inovasi bermaksud sesuatu yang baru diperkenalkan seperti kaedah, sistem dan sebagainya. Tujuan inovasi ini adalah untuk mewujudkan sesuatu bagi mencapai kemajuan yang mampu memberi kebaikan dan manfaat kepada penggunaanya.

Untuk melahirkan seseorang yang mampu meningkatkan mutu pendidikan ke arah lebih berkualiti, maka pendidikan pada masa kini amat perlulah mengikut arus, juga perlu kreatif serta mempunyai idea dalam memperbaharui atau menginovasikan sesuatu perkara yang berkaitan.

Apabila kita membicarakan tentang Inovasi dan kreativiti maka ia nya amat berkait rapat dengan penegasan Allah swt agar hambanya sentiasa merenung dan sentiasa berfikir samaada dalam keadaan duduk atau dalam keadaan baring, merenung tentang makhluk ciptaannya serta melakukan eksplorasi tentang alam semesta yang menjadi bukti dan tanda bagi orang yang memanfaatkan akal untuk berfikir, sebagaimana Firman Nya dalam Surah Ali Imran ayat 190 dan 191 :

إِنَّ فِي خَلْقِ السَّمَوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لَآيَاتٍ لِأُولِي الْأَلْبَابِ ۝
الَّذِينَ يَذْكُرُونَ اللَّهَ قِيَمًا وَقُعُودًا وَعَلَىٰ جُنُوبِهِمْ وَيَتَفَكَّرُونَ فِي خَلْقِ السَّمَوَاتِ
وَالْأَرْضِ رَبَّنَا مَا خَلَقْتَ هَذَا بَطْلًا سُبْحَانَكَ فَقِنَا عَذَابَ النَّارِ ۝

"Sesungguhnya dalam penciptaan langit dan bumi, dan silih bergantinya malam dan siang terdapat tanda-tanda bagi orang-orang yang berakal. "(yaitu) orang-orang yang mengingat Allah sambil berdiri atau duduk atau dalam keadan berbaring dan mereka memikirkan tentang penciptaan langit dan bumi (seraya berkata): "Ya Tuhan Kami, Tiadalah Engkau menciptakan ini dengan sia-sia, Maha suci Engkau, Maka peliharalah Kami dari siksa neraka."

Berdasarkan kepada ayat tersebut, maka begitu jelas membuktikan tentang kehebatan Allah swt mencipta akal manusia yang menjadi dorongan kepada manusia agar sentiasa berfikir dan merenung ciptaan Nya agar manusia menggunakan alam ciptaan Nya ini, selain daripada sebagai sumber rezeki tetapi juga sebagai wasilah untuk berinovasi membina tamadun yang memberi manfaat dan kebaikan kepada orang lain.

Hadirin sidang Jumaat yang berbahagia,

Apabila kita membicarakan tentang inovasi maka ianya tidak dapat lari dari membicarakan tentang soal pendidikan. Pendidikan merupakan wasilah pemindahan ilmu yang sangat penting kepada kita semua dalam melayari arus kemajuan dan kehidupan yang semakin hari semakin penuh dengan cabaran dan dugaan. Di samping itu, amat penting bagi kita untuk memastikan sesuatu yang lebih baik dan berkualiti selari dengan kehendak zaman masa kini. Bahkan bukan sahaja inovasi dalam pendidikan semata-mata tetapi sikap diri kita sendiri juga perlu ada inisiatif dan kesungguhan untuk menghasilkan sesuatu yang boleh memberi impak untuk kesejahteraan dan kemakmuran masyarakat sejagat.

Sebagai seorang yang beriman, kita wajib untuk terus berusaha sedaya mungkin untuk menuntut dan mencari ilmu serta mengkaji sebanyak mungkin, tambahan pula jika ilmu itu adalah sesuatu yang baru, agar umat Islam tidak terus ketinggalan. Maka amatlah rugi bagi umat Islam tidak memanfaatkan ilmu yang luas yang dikurniakan oleh Allah swt demi kebaikan ummat sejagat.

Hal ini juga sebagaimana Hadis Rasulullah SAW yang diriwayatkan oleh Thabrani, Abu Na'im dan Ibnu Abdul Barr, Baginda bersabda :

إِذَا أَتَى عَلَيَّ يَوْمٌ لَا أَزْدَادُ فِيهِ عِلْمًا يُقَرِّبُنِي إِلَى اللَّهِ فَلَا بُورِكَ لِي فِي طُلُوعِ الشَّمْسِ ذَلِكَ الْيَوْمِ

“Apabila datang suatu hari (yang baru) namun tidak bertambah ilmu yang dapat mendekatkan diriku kepada Allah SWT, maka tidak ada keberkatan untukku pada hari itu.”

Hadirin sidang Jumaat yang berbahagia,

Begitu pentingnya ilmu melalui pendidikan, begitu jugalah pentingnya inovasi dalam memastikan kualiti pendidikan sentiasa bertambah baik seiring dengan perkembangan kemajuan arus teknologi dan pembaharuan yang pelbagai masa kini. Islam tidak menolak pembaharuan namun amat perlu bagi seseorang muslim itu menerima sesuatu pembaharuan dan sentiasa berinovasi agar setiap daripada kita dapat mengadaptasi serta menyesuaikan diri dengan setiap pembaharuan yang berlaku dalam apa jua perkara.

Hadirin yang dimuliakan sekalian,

Antara inovasi penting dalam bidang pendidikan yang boleh dan perlu digerakkan secara intensif dan bersepadu di peringkat UiTM ialah melalui pemeraksanaan **institusi Wakaf** dalam pendidikan. Institusi wakaf bertujuan menjana pengumpulan dana yang mampu memberi sumbangan besar dalam bidang pendidikan di peringkat pengajian tinggi ini.

Malah institusi wakaf mempunyai potensi yang besar dalam usaha membangunkan ekonomi masyarakat dan negara. Wakaf mempunyai ciri dinamik dalam menyusun sosio ekonomi masyarakat dan seterusnya memberikan impak positif dalam kemajuan sesebuah negara. Sejarah telah membuktikan bahawa wakaf mampu membantu meningkatkan taraf ekonomi, pendidikan dan sosial umat Islam.

Jika dilihat dari sudut lakaran sejarah, peranan wakaf dalam membangunkan dan memartabatkan institusi-institusi pengajian serta melahirkan ribuan cendekiawan terkenal dan tersohor di seluruh dunia terutama dalam bidang keagamaan sudah tidak dapat dinafikan lagi. Matlamat mewujudkan institusi pendidikan tinggi melalui konsep wakaf yang diilhamkan dari universiti-universiti terkenal dunia seperti Universiti al-Qarawiyyin di

Moroko, Universiti al-Azhar, di Mesir, Universiti Cordova di Sepanyol dan Universiti al-Fateh, di Turki.

Oleh yang demikian, UiTM yang merupakan universiti terbesar di negara ini mampu digerakkan untuk menerajui institusi wakaf ini dengan melibatkan semua kakitangan, para pelajar dan juga alumni yang bilangannya melebihi 800 ribu orang yang boleh menyumbang kewangan dalam bentuk wakaf atau sedekah jariah untuk pembangunan pendidikan anak-anak bangsa.

Hadirin yang dimuliakan sekalian,

Selain dari Inovasi bidang Wakaf, pihak pengurusan UiTM juga telah melakar satu lagi usaha murni bagi memartabat dan mengiktiraf para pelajar dari aliran Tahfiz untuk melanjutkan pengajian mereka dalam bidang-bidang professional di UiTM. Program yang dikenali sebagai **Program Plus Tahfiz UiTM** bertujuan untuk memberi peluang kepada anak-anak Melayu yang telah menghafal Al-Quran sama ada dari institusi pendidikan menengah kerajaan dan juga swasta untuk memilih bidang-bidang pengajian professional yang mereka minati.

Program yang baru bermula semester September 2018 ini telah mendapat sambutan yang amat menggalakkan dan setakat ini sejumlah 360 pelajar lepasan tahfiz ini sedang mengikuti

pengajian di peringkat Asasi, diploma dan ijazah sarjana muda di seluruh sistem UiTM. Pihak Pengurusan UiTM mensasarkan pengambilan sejumlah 3000 pelajar lepasan tahfiz sehingga tahun 2020 dan akan menjadikan **program Plus Tahfiz** sebagai salah satu program utama university. Program ini diharap dapat melahirkan graduan professional yang holistik dan versatile – yang menguasai bidang-bidang profesional dan mempunyai kekuatan akhlak dan berintegriti. Inilah generasi yang diharapkan akan menerajui kepimpinan organisasi dan negara pada masa hadapan yang akan dihasilkan oleh UiTM.

Inilah antara contoh inovasi pendidikan yang berkualiti yang kita semua harap dapat diperjuangkan.

Hadirin sidang Jumaat yang berbahagia,

Oleh yang demikian “**menginsankan inovasi**” seperti tema **Bulan Inovasi UiTM pada tahun ini**, perlu mengutamakan sikap bertanggungjawab golongan berilmu dan cerdas pandai dalam memastikan baik buruknya sesuatu yang direkapipta agar selari dengan kehendak Islam. Suatu mekanisma kawalan atau garis panduan perlu diberi penekanan, bagi memastikan keharmonian sejagat daripada cetusan inovasi dapat dihasilkan. Ia juga sepatutnya dapat menolak kemusnahan sejagat yang jelas

semata-mata untuk kepentingan diri sendiri atau sesuatu pihak yang ingin menghancurkan Islam.

Maka amat perlu warga pendidik memupuk kesedaran melalui ilmu yang dimiliki ke arah memelihara budaya yang baik, yang memberi manfaat dan melahirkan masyarakat beretika. Ianya amat perlu menjadi agenda utama dalam usaha membendung gejala inovasi yang bersifat negatif. Jika tradisi ini dipelihara, inovasi pasti memberi impak positif dan kemajuan yang mapan. Ingatlah apa yang kita hasilkan pada hari ini kita akan dipertanggungjawabkan di hadapan Allah swt pada hari kiamat kelak.

Bagi mengakhiri khutbah pada hari ni, beberapa pengajaran yang boleh kita perolehi daripada khutbah yang disampaikan antaranya ialah:-

PERTAMA :

Inovasi dan kreativiti amat berkait rapat dengan perintah Allah swt agar hambanya sentiasa merenung dan sentiasa berfikir tentang makhluk ciptaannya serta melakukan eksplorasi tentang alam

semesta yang menjadi bukti dan tanda bagi orang yang memanfaatkan akal untuk berfikir.

KEDUA :

Sebagai seorang yang beriman, kita wajib untuk terus berusaha sedaya mungkin untuk menuntut dan mencari ilmu serta mengkaji sebanyak mungkin, tambahan pula jika ilmu itu adalah sesuatu yang baru, agar umat Islam tidak terus ketinggalan. Maka amatlah rugi bagi umat Islam tidak memanfaatkan ilmu yang luas yang dikurniakan oleh Allah swt demi kebaikan ummat sejagat.

KETIGA :

Sikap bertanggungjawab golongan berilmu dan cerdik pandai dalam memastikan baik buruknya sesuatu yang direkacipta perlu selari dengan kehendak agama. Oleh yang demikian, mekanisma kawalan atau garispanduan perlu diberi penekanan, bagi memastikan keharmonian manusia sejagat daripada cetusan inovasi dapat dihasilkan.

أَعُوذُ بِاللَّهِ مِنَ الشَّيْطَانِ الرَّجِيمِ
شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُو الْعِلْمِ قَائِمًا بِالْقِسْطِ
لَا إِلَهَ إِلَّا هُوَ الْعَزِيزُ الْحَكِيمُ (18)

“Allah menerangkan (kepada sekalian makhluknya dengan dalil-dalil dan bukti), bahawasanya tiada Tuhan (yang berhak disembah) melainkan Dia, Yang sentiasa mentadbirkan (seluruh alam) dengan keadilan dan malaikat-malaikat serta orang-orang yang berilmu (yang mengakui dan menegaskan), tiada Tuhan (yang berhak disembah) melainkan Dia; Yang Maha Kuasa, lagi Maha Bijaksana.” (Surah Ali Imran Ayat 18)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ،
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ
تِلَاوَتَهُ، إِنَّهُ هُوَ السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ
لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ،
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Edited : 13/12/2018